

中国史学要籍丛刊

〔汉〕司马迁撰 〔南朝宋〕裴骃集解 〔唐〕司马贞索引 〔唐〕张守节正义

史記

三



上海古籍出版社

〔汉〕司马迁撰 〔南朝宋〕裴骃集解 〔唐〕司马贞索引 〔唐〕张守节正义

史記

三

卷四十四

魏世家第十四

魏之先，毕公高之后也。毕公高与周同姓。^①武王之伐纣，而高封于毕，^②于是为毕姓。其后绝封，为庶人，或在中国，或在夷狄。其苗裔曰毕万，事晋献公。

①【索隐】《左传》富辰说文王之子十六国有毕、原、丰、郇，言毕公是文王之子。此云与周同姓，似不用《左氏》之说。马融亦云毕、毛，文王庶子。

②【集解】杜预曰：“毕在长安县西北。”【正义】《括地志》云：“毕原在雍州万年县西南二十八里。”

献公之十六年，赵夙为御，毕万为右，以伐霍、耿、魏，灭之。以耿封赵夙，以魏封毕万，^①为大夫。卜偃曰：^②“毕万之后必大矣。万，满数也。魏，大名也。以是始赏，天开之矣。天子曰兆民，诸侯曰万民。今命之大，以从满数，其必有众。”初，毕万卜事晋，遇《屯》之《比》。辛廖占之，曰：“吉。屯固比入，吉孰大焉，其必蕃昌。”

①【正义】魏城在陕州芮城县北五里。郑玄《诗谱》云：“魏，姬姓之国，武王伐纣而封焉。” ②【索隐】晋掌卜大夫郭偃也。

毕万封十一年，晋献公卒，四子争更立，晋乱。而毕万之世弥大，从其国名为魏氏。生武子。^①魏武子以魏诸子事晋公子重耳。晋献公之二十一年，武子从重耳出亡。十九年反，重耳立为晋文公，而令魏武子袭魏氏之后封，列为大夫，治于魏。生悼子。

①【索隐】《左传》武子名犇。《系本》云“毕万生芒季，芒季生武仲州”。州与犇声相近，字异耳，代亦不同。

魏悼子徙治霍。^①生魏绛。^②

①【索隐】《系本》云“武仲生庄子绛”，无悼子。又《系本·居篇》曰“魏武子居魏，悼子徙霍”。宋忠曰“霍，今河东鹑县也”。则是有悼子，《系本》卿大夫代自脱耳。然魏，今河北魏县是也。【正义】晋州霍邑县，汉鹑县也，后汉改曰永安，隋改曰霍邑，本春秋时霍伯国也。②【索隐】谥昭子。《系本》云“庄子”，文错也。《居篇》又曰“昭子徙安邑”，亦与此文同也。

魏绛事晋悼公。悼公三年，会诸侯。悼公弟杨干乱行，魏绛僇辱杨干。^①悼公怒曰：“合诸侯以为荣，今辱吾弟。”将诛魏绛。或说悼公，悼公止。卒任魏绛政，使和戎、翟，戎、翟亲附。悼公之十一年，曰：“自吾用魏绛，八年之中，九合诸侯，戎、翟和，子之力也。”赐之乐，三让，然后受之。徙治安邑。^②魏绛卒，谥为昭子。^③生魏嬴。嬴生魏献子。^④

①【索隐】《左传》曰僇杨干之仆。

②【正义】安邑在绛州夏县安

邑故城是。 ③【集解】徐广曰：“《世本》曰庄子。” ④【索隐】《系本》云“献子名荼。荼，庄子之子”。无魏嬴。

献子事晋昭公。昭公卒而六卿强，公室卑。

晋顷公之十二年，韩宣子老，魏献子为国政。晋宗室祁氏、羊舌氏相恶，六卿诛之，尽取其邑为十县，六卿各令其子为之大夫。献子与赵简子、^①中行文子、^②范献子^③并为晋卿。

①【索隐】赵鞅。 ②【索隐】荀寅。 ③【索隐】范吉射。

其后十四岁而孔子相鲁。后四岁，赵简子以晋阳之乱也，而与韩、魏共攻范、中行氏。魏献子生魏侈。^①魏侈与赵鞅共攻范、中行氏。

①【索隐】侈，他本亦作“哆”，盖“哆”字误，而代数错也。按《系本》“献子生简子取，取生襄子多”，而《左传》云“魏曼多”是也。则侈是襄子，中间少简子一代。

魏侈之孙曰魏桓子，^①与韩康子、^②赵襄子^③共伐灭知伯，^④分其地。

①【索隐】《系本》云：“襄子生桓子驹。” ②【索隐】名虔。

③【索隐】名无恤。 ④【索隐】智伯，智瑶也，本姓荀，亦曰荀瑶。【正义】知音智。《括地志》云：“故智城在蒲州虞乡县西北四十里。《古今地名》云解县有智城，盖谓此也。”

桓子之孙曰文侯都。^①魏文侯元年，秦灵公之元年也。与韩武子、赵桓子、^②周威王同时。

①【集解】徐广曰：“《世本》曰斯也。”【索隐】《系本》云“桓子生文侯斯”，其传云“孺子疵是魏驹之子”，与此系代亦不同也。②【索隐】《系本》“武子名启章，康子子。桓子名嘉，襄子之子”。

六年，城少梁。十三年，使子击围繁、庞，出其民。十六年，伐秦，筑临晋元里。

十七年，伐中山，使子击守之，赵仓唐傅之。子击逢文侯之师田子方于朝歌，引车避，下谒。田子方不为礼。子击因问曰：“富贵者骄人乎？且贫贱者骄人乎？”子方曰：“亦贫贱者骄人耳。夫诸侯而骄人则失其国，大夫而骄人则失其家。贫贱者，行不合，言不用，则去之楚、越，若脱跣然，奈何其同之哉！”子击不怩而去。西攻秦，至郑而还，筑雒阴、合阳。^①

①【正义】雒，漆沮水也，城在水南。郃阳，郃水之北，《括地志》云：“郃阳故城在同州河西县南三里。雒阴在同州西也。”

二十二年，魏、赵、韩列为诸侯。

二十四年，秦伐我，至阳狐。^①

①【正义】《括地志》云：“阳狐郭在魏州元城县东北三十里也。”

二十五年，子击生子蒍。^①

①【索隐】乙耕反。击，武侯也。蒍，惠王也。

文侯受子夏经艺，客段干木，过其闾，未尝不轼也。^①秦尝欲伐魏，或曰：“魏君贤人是礼，国人称仁，上下和合，未可图也。”文侯由此得誉于诸侯。

①【正义】过，光卧反。文侯轼干木闾也。皇甫谧《高士传》云：“木，晋人也，守道不仕。魏文侯欲见，造其门，干木逾墙避之。文侯以客礼待之，出过其闾而轼。其仆曰：‘君何轼？’曰：‘段干木贤者也，不趣势利，怀君子之道，隐处穷巷，声驰千里，吾安得勿轼！干木先乎德，寡人先乎势；干木富乎义，寡人富乎财。势不若德贵，财不若义高。’又请为相，不肯。后卑己固请见，与语，文侯立倦不敢息。”《淮南子》云：“段干木，晋之大狙，而为文侯师。”《吕氏春秋》云：“魏文侯见段干木，立倦而不敢息。及见翟璜，踞于堂而与之言。翟璜不悦。文侯曰：‘段干木，官之则不肯，禄之则不受。今汝欲官则相至，欲禄则上卿至，既受吾赏，又责吾礼，无乃难乎？’”

任西门豹守邺，而河内^①称治。

①【索隐】按：大河在邺东，故名邺为河内。【正义】古帝王之都多在河东、河北，故呼河北为河内，河南为河外。又云河从龙门南至华阴，东至卫州，折东北入海，曲绕冀州，故言河内云也。

魏文侯谓李克曰：“先生尝教寡人曰‘家贫则思良妻，国乱则思良相’。今所置非成则璜，^①二子何如？”李克对曰：

“臣闻之，卑不谋尊，疏不谋戚。臣在阙门之外，不敢当命。”文侯曰：“先生临事勿让。”李克曰：“君不察故也。居视其所亲，富视其所与，达视其所举，穷视其所不为，贫视其所不取，五者足以定之矣，何待克哉！”文侯曰：“先生就舍，寡人之相定矣。”李克趋而出，过翟璜之家。翟璜曰：“今者闻君召先生而卜相，果谁为之？”李克曰：“魏成子为相矣。”翟璜忿然作色曰：“以耳目之所睹记，臣何负于魏成子？西河之守，臣之所进也。君内以邲为忧，臣进西门豹。君谋欲伐中山，臣进乐羊。中山以拔，无使守之，臣进先生。君之子无傅，臣进屈侯鲋。臣何以负于魏成子！”李克曰：“且子之言克于子之君者，岂将比周以求大官哉？君问而置相‘非成则璜，二子何如’？克对曰：‘君不察故也。居视其所亲，富视其所与，达视其所举，穷视其所不为，贫视其所不取，五者足以定之矣，何待克哉。’是以知魏成子之为相也。且子安得与魏成子比乎？魏成子以食禄千钟，什九在外，什一在内，是以东得卜子夏、田子方、段干木。此三人者，君皆师之。子之所进五人者，君皆臣之。子恶得与魏成子比也？”翟璜逡巡再拜曰：“璜，鄙人也，失对，愿卒为弟子。”

①【集解】徐广曰：“文侯弟名成。”

二十六年，虢山崩，壅河。^①

①【集解】徐广曰在陕。驷案：《地理志》曰弘农陕县故虢国。北虢在大阳，东虢在荥阳。【正义】《括地志》云：“虢山在陕州陕县西二里，临黄河。”

今临河有冈阜，似是赧山之余也。”

三十二年，伐郑。城酸枣。败秦于注。^①三十五年，齐伐取我襄陵。^②三十六年，秦侵我阴晋。^③

①【集解】司马彪曰：“河南梁县有注城也。”【正义】《括地志》云：“注城在汝州梁县西十五里。注，或作‘铸’也。”②【集解】徐广曰：“今在南平阳县也。”③【集解】徐广曰：“今之华阴。”【索隐】按：年表作“齐侵阴晋”。《秦本纪》云“惠王六年，魏纳阴晋，更名曰宁秦”。徐氏云“今之华阴也”。

三十八年，伐秦，败我武下，得其将识。^①是岁，文侯卒，^②子击立，是为武侯。

①【索隐】识，将名也。武下，魏地。【正义】《括地志》云：“故武城一名武平城，在华州郑县东十三里。”②【索隐】《纪年》云五十年卒。

魏武侯元年，赵敬侯初立，^①公子朔为乱，不胜，奔魏，与魏袭邯郸，魏败而去。

①【索隐】按：《纪年》魏武侯之元年当赵烈侯之十四年，不同也。又《系本》敬侯名章。

二年，城安邑、王垣。^①七年，伐齐，至桑丘。^②九年，翟败我于浞。^③使吴起伐齐，至灵丘。^④齐威王初立。^⑤

①【集解】徐广曰：“垣县有王屋山也。”【索隐】按：《纪年》十四年城洛阳及安邑、王垣。徐广云“垣县有王屋山，故曰王垣”。【正义】《括地志》云：“故城汉垣县，本魏王垣也，在绛州垣县西北二十里也。” ②【正义】年表云“齐伐燕，取桑丘”，故魏救燕伐齐，至桑丘也。《括地志》云：“桑丘故城俗名敬城，在易州遂城县界也。” ③【索隐】古外反。于浚，于浚水之侧。【正义】《括地志》云：“浚高山又云浚山，在绛州翼城县东北二十五里，浚水出此山也。” ④【正义】灵丘，蔚州县也。时属齐，故三晋伐之也。 ⑤【索隐】按《纪年》，齐幽公之十八年而威王立。

十一年，与韩、赵三分晋地，灭其后。十三年，秦献公县栎阳。十五年，败赵北蔺。^①

①【正义】在石州，赵之西北。属赵，故云赵北蔺也。

十六年，伐楚，取鲁阳。^①武侯卒，^②子菑立，是为惠王。

①【正义】今汝州鲁山县也。 ②【索隐】按《纪年》，武侯二十六年卒。

惠王元年，初，武侯卒也，子菑与公中缓^①争为太子。公孙颀^②自宋入赵，自赵入韩，谓韩懿侯^③曰：“魏菑与公中缓争为太子，^④君亦闻之乎？今魏菑得王错，^⑤挟上党，固半国也。因而除之，^⑥破魏必矣，不可失也。”懿侯说，乃与赵成侯^⑦合军并兵以伐魏，战于浊泽，^⑧魏氏大败，魏君围。赵谓韩曰：“除魏君，立公中缓，割地而退，我且利。”韩曰：“不可。杀魏君，人必曰暴；割地而退，人必曰贪。不如两分之。魏

分为两，不强于宋、卫，则我终无魏之患矣。”赵不听。韩不说，以其少卒夜去。惠王之所以身不死，国不分者，二家谋不和也。若从一家之谋，则魏必分矣。故曰“君终无嫡子，其国可破也”。^⑨

①【正义】中音仲。 ②【索隐】音祈。 ③【索隐】哀侯之子。

④【索隐】按：《纪年》“武侯元年封公子缓。赵侯种、韩懿侯伐我，取蔡，而惠王伐赵，围浊阳。七年，公子缓如邯郸以作难”，是说此事矣。 ⑤【集解】徐广曰：“《汲冢纪年》惠王二年，魏大夫王错出奔韩也。”

⑥【集解】徐广曰：“除，一作‘倍’。”【正义】按：除，除魏莹及王错也。 ⑦【索隐】《系本》云：“成侯名种。”

⑧【集解】徐广曰：“长社有浊泽。” ⑨【索隐】此盖古人之言及俗说，故云“故曰”。

二年，魏败韩于马陵，败赵于怀。三年，齐败我观。^①五年，与韩会宅阳。^②城武堵。为秦所败。^③六年，伐取宋仪台。^④九年，伐败韩于浞。与秦战少梁，虏我将公孙痤，^⑤取庞。秦献公卒，子孝公立。

①【集解】徐广曰：“《齐世家》云献观以和齐。年表曰伐魏取观。今之卫县也。”【索隐】《田完系家》云：“败魏于浊津而围惠王，惠王请献观以和解。”【正义】观音馆。魏州观城县，古之观国。《国语注》：“观国，夏启子太康第五弟之所封也，夏衰，灭之矣。”

②【正义】《括地志》云：“宅阳故城一名北宅，在郑州荥阳县东南十七里也。” ③【集解】徐广曰：“《秦年表》曰败韩、魏洛阴。”

④【集解】徐广曰：“一作义台。”【索隐】按：年表作“义台”，然义台见《庄子》，司马彪亦曰台名，郭象云义台，灵台。

⑤【集解】徐广曰：“年表云虏我太子也。”

十年，伐取赵皮牢。彗星见。十二年，星昼坠，有声。

十四年，与赵会鄆。十五年，鲁、卫、宋、郑君来朝。^①十六年，与秦孝公会（社）〔杜〕平。侵宋黄池，宋复取之。

①【索隐】按：《纪年》鲁恭侯、宋桓侯、卫成侯、郑釐侯来朝，皆在十四年，是也。郑釐侯者，韩昭侯也。韩哀侯灭郑而徙都之，改号曰郑。

十七年，与秦战元里，秦取我少梁。围赵邯郸。十八年，拔邯郸。赵请救于齐，齐使田忌、孙臧救赵，败魏桂陵。十九年，诸侯围我襄陵。筑长城，塞固阳。^①

①【正义】塞，先代反。《括地志》云：“桐阳县，汉旧县也，在银州银城县界。”按：魏筑长城，自郑滨洛，北达银州，至胜州固阳县为塞也。固阳有连山，东至黄河，西南至夏、会等州。桐音固矣。

二十年，归赵邯郸，与盟漳水上。^①二十一年，与秦会彤。赵成侯卒。^②二十八年，齐威王卒。中山君相魏。^③

①【正义】邯郸，洺州县也。漳，水名。漳水源出洺州武安县三门山也。

②【集解】徐广曰：“年表云二十七年，丹封名会。丹，魏大臣也。”

③【索隐】按：魏文侯灭中山，其子击守之，后寻复国，至是始令相魏。其中山后又为赵所灭。

三十年，魏伐赵，^①赵告急齐。齐宣王用孙子计，救赵击魏。魏遂大兴师，使庞涓将，而令太子申为上将军。过外黄，外黄徐子^②谓太子曰：“臣有百战百胜之术。”太子曰：“可

得闻乎？”客曰：“固愿效之。”曰：“太子自将攻齐，大胜并莒，^③则富不过有魏，贵不益为王。若战不胜齐，则万世无魏矣。此臣之百战百胜之术也。”太子曰：“诺，请必从公之言而还矣。”客曰：“太子虽欲还，不得矣。彼劝太子战攻，欲啜汁者众。^④太子虽欲还，恐不得矣。”太子因欲还，其御曰：“将出而还，与北同。”太子果与齐人战，败于马陵。^⑤齐虏魏太子申，杀将军涓，军遂大破。

①【正义】《孙臆传》云“魏与赵攻韩，韩告急齐”，此文误耳。魏伐赵，赵求救齐，齐使孙臆救赵，败魏桂陵，乃在十八年也。

②【集解】刘向《别录》曰：“徐子，外黄人也。”外黄时属宋。【正义】《括地志》云：“故圉城有南北二城，在汴州雍丘县界，本属外黄，即太子申见徐子之地也。”

③【正义】莒，密州县也，在齐东南。言从西破齐，并至莒地，则齐土尽矣。

④【正义】啜，穿悦反。汁，之入反。冀功勋者众也。

⑤【集解】徐广曰：“在元城。”【索隐】按：《纪年》二十八年，与齐田盼战于马陵；上二年，魏败韩马陵；十八年，赵又败魏桂陵。桂陵与马陵异处。【正义】虞喜《志林》云：“马陵在濮州鄄城县东北六十里，有陵，涧谷深峻，可以置伏。”按：庞涓败即此也。徐说马陵在魏州元城县东南一里，庞涓败非此地也。《田完世家》云“宣王二年，魏伐赵，赵与韩亲，共击魏，赵不利，战于南梁。韩氏请于齐，齐使田忌、田婴将，孙子为师，救韩、赵，以击魏，大破之马陵”。按：南梁在汝州。又此传云“太子为上将军，过外黄”。又《孙臆传》云“魏与赵攻韩，韩告急齐，齐使田忌将而往，直走大梁。魏将庞涓闻之，去韩而归，齐军已过而西矣”。按：孙子减灶退军，三日行至马陵，遂杀庞涓，虏魏太子申，大破魏军，当如虞喜之说，从汴州外黄退至濮州东北六十里是也。然赵、韩共击魏，战困于南梁，韩急，请教于齐，齐师走大梁，败魏马陵，岂合更渡河北，至魏州元城哉？徐说定非也。

三十一年，秦、赵、齐共伐我，^①秦将商君诈我将军公子卬而袭夺其军，破之。秦用商君，东地至河，而齐、赵数破我，安邑近秦，于是徙治大梁。^②以公子赫为太子。

①【索隐】按：《纪年》“二十九年五月，齐田盼伐我东鄙。九月，秦卫鞅伐我西鄙。十月，邯郸伐我北鄙。王攻卫鞅，我师败绩”是也。然言二十九年，不同。

②【集解】徐广曰：“今浚仪。”骀案：《汲冢纪年》曰“梁惠成王九年四月甲寅，徙都大梁”也。

【索隐】《纪年》以为惠王九年，盖误也。【正义】《陈留风俗传》云“魏之都也，毕万十叶徙大梁”。按：今汴州浚仪也。

三十三年，秦孝公卒，商君亡秦归魏，魏怒，不入。三十五年，与齐宣王会平阿南。^①

①【集解】《地理志》沛郡有平阿县也。

惠王数被于军旅，卑礼厚币以招贤者。邹衍、淳于髡、孟轲皆至梁。梁惠王曰：“寡人不佞，兵三折于外，太子虢，上将死，国以空虚，以羞先君宗庙社稷，寡人甚丑之。叟不远千里，^①辱幸至弊邑之廷，将何以利吾国？”孟轲曰：“君不可以言利若是。夫君欲利则大夫欲利，大夫欲利则庶人欲利，上下争利，国则危矣。为人君，仁义而已矣，何以利为！”

①【集解】刘熙曰：“叟，长老之称，依皓首之言。”

三十六年，复与齐王会甄。是岁，惠王卒，^①子襄王立。^②

①【索隐】按《纪年》，惠成王三十六年改元称一年，未卒也。

②【索隐】《系本》襄王名嗣。

襄王元年，与诸侯会徐州，^①相王也。追尊父惠王为王。^②

①【集解】徐广曰：“今薛县。” ②【集解】徐广曰：“二年，伐赵。”

五年，秦败我龙贾军四万五千于雕阴，^①围我焦、曲沃。^②予秦河西之地。^③

①【集解】徐广曰：“在上郡。”【正义】《括地志》云：“彫阴故县在鄜州洛交县北三十里，彫阴故城是也。” ②【正义】《括地志》云：“故焦城在陕县东北百步古虢城中东北隅，周同姓也。曲沃有城，在陕县西南三十二里。按：今有曲沃店也。” ③【正义】自华州北至同州，并魏河北之地，尽入秦也。

六年，与秦会应。^①秦取我汾阴、皮氏、焦。^②魏伐楚，败之陉山。^③七年，魏尽入上郡于秦。^④秦降我蒲阳。^⑤八年，秦归我焦、曲沃。

①【集解】徐广曰：“颍川父城有应乡也。”【正义】应，乙陵反。《括地志》云：“故应城，故应乡也，在汝州鲁山县东三十里。” ②【正义】《括地

志》云：“汾阴故城在蒲州汾阴县北九里。皮氏故城在绛州龙门县西一百八十步也。” ③【集解】徐广曰：“在密县。”【正义】《括地志》云：“陞山在郑州新郑县西南三十里。” ④【正义】《括地志》云：“上郡故城在绥州上县东南五十里，秦、魏之上郡地也。”按：丹、郿、延、绥等州，北至固阳，并上郡地。魏筑长城界秦，自华州郑县已北，滨洛至庆州洛源县白于山，即东北至胜州固阳县，东至河西上郡之地，尽入于秦。 ⑤【正义】在隰州，隰川县蒲邑故城是也。

十二年，楚败我襄陵。诸侯执政与秦相张仪会齧桑。^①十三年，张仪相魏。魏有女子化为丈夫。秦取我曲沃、平周。^②十六年，襄王卒，子哀王立。^③张仪复归秦。

①【集解】徐广曰：“在梁与彭城之间。” ②【正义】绛州桐乡县，晋曲沃邑。《十三州志》云：“古平周县在汾州介休县西五十里也。” ③【集解】荀勗曰：“和嶠云‘《纪年》起自黄帝，终于魏之今王’。今王者，魏惠成王子。案《太史公书》惠成王但言惠王，惠王子曰襄王，襄王子曰哀王。惠王三十六年卒，襄王立十六年卒，并惠、襄为五十二年。今案古文，惠成王立三十六年，改元称一年，改元后十七年卒。《太史公书》为误分惠、成之世，以为二王之年数也。《世本》惠王生襄王而无哀王，然则今王者魏襄王也。”【索隐】按：《系本》襄王生昭王，无哀王，盖脱一代耳。而《纪年》说惠成王三十六年，又称后元一十七年卒。今此文分惠王之历以为二王之年，又有哀王，凡二十三年，纪事甚明，盖无足疑。而孔衍叙《魏语》亦有哀王。盖《纪年》之作失哀王之代，故分襄王之年为惠王后元，即以襄王之年包哀王之代耳。

哀王元年，五国共攻秦，^①不胜而去。

①【正义】韩、魏、楚、赵、燕也。

二年，齐败我观津。^①五年，秦使樗里子^②伐取我曲沃，走犀首^③岸门。^④六年，秦（求）〔来〕立公子政^⑤为太子。与秦会临晋。七年，攻齐。^⑥与秦伐燕

①【正义】《括地志》云：“观津城在冀州枣阳县东南二十五里。”本赵邑，今属魏也。 ②【索隐】秦昭王弟疾居樗里，因号焉。 ③【索隐】犀首，官名，即公孙衍。

④【集解】徐广曰：“颍阴有岸亭。”【索隐】刘氏云“河东皮氏县有岸头亭”也。【正义】《括地志》云：“岸门在许州长社县西北十八里，今名西武亭。” ⑤【索隐】魏公子也。 ⑥【集解】徐广曰：“年表云击齐，虏赘子于濮也。”

八年，伐卫，拔列城二。^①卫君患之。如耳^②见卫君曰：“请罢魏兵，免成陵君可乎？”卫君曰：“先生果能，孤请世世以卫事先生。”如耳见成陵君曰：“昔者魏伐赵，断羊肠，拔阙与，^③约斩赵，赵分而为二，所以不亡者，魏为从主也。今卫已迫亡，将西请事于秦。与其以秦酈卫，不如以魏酈卫，^④卫之德魏必终无穷。”成陵君曰：“诺。”如耳见魏王曰：“臣有谒于卫。卫故周室之别也，其称小国，多宝器。今国迫于难而宝器不出者，其心以为攻卫酈卫不以王为主，故宝器虽出必不入于王也。臣窃料之，先言酈卫者必受卫者也。”如耳出，成陵君入，以其言见魏王。魏王听其说，罢其兵，免成陵君，终身不见。